



DGPR

DEMOCRATIC GREEN PARTY OF RWANDA

ISHYAKA RIHARANIRA DEMOKARASI NO KURENGERA IBIDUKIKIJE MU RWANDA

B.P. 6334 KIGALI-RWANDA
Tel : + 250 788 563 039, E-mail : info@rwandagreendemocrats.org
Website : www.rwandagreendemocrats.org

ISHYAKA RIHARANIRA DEMOKARASI NO KURENGERA IBIDUKIKIJE MU RWANDA-DGPR

Incamace y'imigabo n'imigambi y'Ishyaka Riharanira Demokarasi no Kurengera Ibidukikije mu Rwanda (Democratic Green Party of Rwanda) izibandwaho mu matora y'abadepite azaba kuwa 2 na 3 Nzeri 2018.

UBUTABERA

- ✓ Tuzaharanira ko u Rwanda ruba igihugu cyubahiriza amategeko, uburenganzira bwa muntu, amategeko mpuzamahanga ndetse no kugira ubutabera busesuye kuri bose;
- ✓ Ku bijyanye n'ifunga n'ifungurwa, tuzashyiraho amategeko anoze habe hari ibihamya bihagije by'ukekwaho icyaha mbere y'ukwo afungwa;
- ✓ Ku bijyanye n'itangwa ry'ibirego bishingiye ku ikoranabuhanga, tuzashyira ICT CENTER muri buri Kagari;
- ✓ Ibihembo by'abunganizi mu mategeko ndetse n'abahesha b'inkiko, tuzaharanira ko bishingira kubyiciro by'ubudehe;
- ✓ Tuzashyiraho itegeko rishyiraho ikigega gifasha abakwiriye ubufasha mubyamategeko.
- ✓ Tuzavugurura amategeko agena ibihembo by'abunganizi mu by'amategeko (Abavoka) bagabanyirizwe imisoro batanga;
- ✓ Tuzaharanira ko urukiko rw'ikirenga rugira ubudahangarwa dukureho itegeko ritanga uburenganzira bwo kujuririra ibyemezo byarwo kurwego rw'umuvunyi;
- ✓ Tuzashyiraho urukiko rushinzwe kurinda iremezo ry'itegeko-nshinga.

UBURENGANZIRA BWA MUNTU

- ✓ Tuzashyiraho itegeko ry'uko abahamijwe n'inkiko kubyaha bito baja bakora ibihano nsimburagifungo cyangwa bagatanga ingwate z'amafaranga nkuko mu bihugu byateye imbere bikorwa. Iyi politike ikazagabanya umubare mwinshi mu magereza;
- ✓ Ku bijyanye n'ubwisanzure mu gutanga ibitekerezo, tuzashyiraho uburyo buhamye bwo kwisanzura mu gutanga ibitekerezo no kuvuga icyo ushaka, ariko hirindwa imvugo zishora abantu mu macakubiri;
- ✓ Tuzashyiraho itegeko ry'uko ku bagororwa bageze mu zabukuru n'abandi bafite indwara zidakira hazajya hakorwa ibarura n'ijonjora bitewe nuko bitwaye mu gihano bakatiwe

kandi bakaba baramaze kwicuza icyaha barekurwa by'agateganyo bakarangiriza mu miryango yabo igihano gisubitse;

- ✓ Tuzaharanira ko haba ubwisanzure mu mikorere y'imiryango itegamiye kuri Leta igamije uburenganzira bwa muntu, hashyirweho na gahunda yo kuyongerera ubushobozi.

ITANGAZAMAKURU

- ✓ Tuzashyiraho itegeko rishyiraho ikigega gifasha itangazamakuru kwiyubaka cyane cyane iryigenga;
- ✓ Tuzashyigikira itangazamakuru ryigenga, rihabwe ubushobozi ndetse habeho isaranganywa ry'amasoko ya Leta mu bijyanye no kwamamaza, hashyirweho gahunda zifasha itangazamakuru ryigenga mu iterambere hanatangwa uburenganzira mu gutangaza inkuru mu bwisanzure, hakorwe n'amavugururwa agenga itangazamakuru;
- ✓ Tuzaharanira ko habaho minisiteri ishyinzwe itangazamakuru, kugirango yite kubijyanye naryo kuburyo bw'umwihariko.

IMIYOBORERE MYIZA:

- ✓ Tuzashyiraho politiki y'imiyoborere ihamye yo kumenyesha abaturage ibigiye kubakorerwa ndetse no kubagisha inama no gufatira hamwe ibyemezo;
- ✓ Tuzashyiraho gahunda ihamye ihesha utugali ubushobozi kuburyo Akagali kazaba gafite abakozi 4, tuzashakira abayobozi b'utugali za moto mu rwego rwo kwihutisha no kunoza akazi, hazategurwa kandi igihembo ku bayobozi b'imidugudu mu rwego rwo gukuraho ruswa ibabarirwamo;
- ✓ Tuzanoza itegeko rirebana n'itorero ry'Igihugu, tunashyireho gahunda ihamye itagize aho ihuriye n'icengezamatwara ry'ishyaka runaka.

UMUTEKANO N'UBUSUGIRE BW'IGIHUGU

Nta mutekano, nta majyambere kandi umutekano n'ingenzi mu miyoborere y'igihugu,

- ✓ Tuzashyiraho itegeko rigena Inama nkuru y'Igihugu y'umutekano (National Security Council-Conseil National de la Sécurité) uru rwego rukazafasha inzego za gisivile n'inzego za gisirikare gufatanya gukemura no gukumira ibibazo by'umutekano n'abasivile babigizemo uruhare;
- ✓ Ku bijyanye n'imitwe yitwaje intwari, tuzashyiraho amategeko akaza umutekano ku mbibi z'u Rwanda hakoreshejwe ibyuma by'ikoranabuhanga rigezweho;

- ✓ Tuzashyiraho amategeko ateza imbere umubano mwiza n'amahanga duhereye ku bihugu duturanye kugira ngo inkuta zose zitubuza gusabana no guhahirana zivanweho, hazongerwa abapolisi ku rwego rw'utugali mu gukumira ababurirwa irengero;
- ✓ Kubijyanye n'impfu za buri muni z'abafungwa, abashinzwe umutekano bazongererwa ubumenyi bahabwe n'ubushobozi n'ikoranabuhanga kuburyo igihe umufungwa atorotse bashobora kumufata mu bundi buryo, kurasa akaba aricyo gisubizo cyanyuma kandi hifashishijwe amasasu atica (rubber bullets);
- ✓ Tuzavugurura amategeko azamura umushahara w'abasilikare n'abapolisi dushingiye ku biciro by'ifaranga uko rihagaze ku isoko;
- ✓ Tuzashyigikira Politike yo kubakira abasirikare ndetse n'abapolisi amacumbi bareke kurara mumahema cyangwa ku gasozi;
- ✓ Tuzashyiraho Politike iteza imbere umutekano w'abanyagihu kurusha umutekano w'imbibi;
- ✓ Tuzashyiraho amategeko n'ingamba zizatanga umutekano n'ubuziranenge kubiribwa;

UBUTAKA

Tuzasuzuma itegeko rigenga politiki y'ubutaka mu Rwanda hagamijwe ivugururwa rishyingiye ku bitekerezo by'abaturage.

- ✓ Tuzashyiraho itegeko rikuraho umusoro w'ubutaka rigasubiza abenegihugu uburenganzira ku butaka.
- ✓ Tuzasuzuma, tugamije gushyiraho itegeko rivugurura ibyiciro by'ubutaka kugirango hongere ubuso bwo guturaho.
- ✓ Tuzashyiraho itegeko rigena ikorwa ry'igishushanyo mbonera k'ubutaka bwose bw'igihugu kuburyo buri kagali kagira ahagenewe guhinga n'ahagenewe kubakwa.

UBUKUNGU

- ✓ Tuzashyiraho itegeko rigena ikigo cyigenga gihuza abasoreshwa na RRA kikazaba gishinzwe kwakira ibibazo by'abasoreshwa ku buryo mu gihe habayeho guhohoterwa ku musoreshwa cyangwa atanyuzwe n'ibyemezo byamufatiye azajya yitabaza icyo kigo nkemurampaka;
- ✓ Tuzashyiraho itegeko ryo gusoresha bitewe n'ubushobozi bw'usoreshwa (*progressive taxation*);

- ✓ Tuzateza imbere ubucuruzi kurwego mpuzamahanga tugamije kongera ubukungu bw'igihugu cyacu;
- ✓ Tuzavugurura itegeko rijyanye n'amafaranga atangwa aho ibinyabiziga bihagarara kuburyo hagenwa noneho imodoka zihagarara kumaduka n'ahandi hubucuruzi ntizishyure amafaranga.
- ✓ Tuzashyiraho itegeko rigena igabanywa ry'umusoro wakwa kubinyabiziga bitumizwa mu mahanga kugirango na rubanda ruciriritse rubashe kwigezaho imodoka, tunagabanye imodoka zishaje zihumanya ikirere;
- ✓ Tuzashyiraho Politiki yo gukwirakwiza amato mato n'amanini agezweho mu biyaga binini n'ibito mu Rwanda, hashyirweho n'amashuri yo gutoza abadereva b'amato mu rwego rwo kugabanya impfu zo mu mazi no kwihutisha iterambere abo badereva bashirirweho n'impushya zo gutwara ayo mato (*permis de conduire*);

UBUCURUZI

- ✓ Tuzashyiraho Politike izafasha abikorera ku giti cyabo kugira ngo bongererwe ubushobozi k'umusaruro babonaga bityo baguritse no mumahanga;
- ✓ Tuzashyiraho itegeko rigena, rigateza imbere inganda ziciriritse n'izihambaye ariko zidahumanya ibidukikije (green and clean industries);
- ✓ tuzateza imbere inganda zitunganya ibivuye mu bihingwa (Agro-processing industries) n'umutungo wo mu butaka(mineral processing industries);
- ✓ tuzashyiraho itegeko rigena ibigo by'ubucuruzi (Banki) iteza imbere ibyinjira n'ibisohoka (**EXPORT-IMPORT BANK**) zigamije korohereza abacuruzi;
- ✓ tuzashyiraho politike yoroherereza ba rwiyezeza mirimo habeho ipiganwa riciye mumucyo kandi ibigo bya Leta bye kwemererwa kujya mumapiganwa,

UBUHINZI N'UBWOROZI

- ✓ Tuzashyiraho itegeko rigena imiturire n'imyubakire aho tuzakoresha inyigo y'imikoreshereze y' ubutaka buto mu gutura nko mu bihugu by'ubuyapani n'ahandi kugirango tubashe kurokora ubutaka buhingwa;
- ✓ Tuzashyiraho Politiki y' ubuhinzi bugezweho harimo gahunda ihanye yo kuvomerera imyaka yo ku misozi ndetse no mu bishanga kugira ngo bidufashe guhangana n'ikibazo cy'ibura ry'imvura mubihe by'izuba;

- ✓ Tuzashyiraho gahunda yo korohereza, ikanatera inkunga ibigo bikora ubushakashatsi bw'ubuhinzi n'ubworozi;
- ✓ Tuzashyiraho itegeko ngenga ryongera umusaruro w'ibihingwa bizana amadovize (ikawa, icyayi...) kukigero cya 20% ndetse duhuze abahinzi babyo n'amasoko yo hanze babe aribo bemeranya kubiciro;
- ✓ Tuzashyiraho itegeko rigena aho bororera hatandukanye bitewe n'ubworozi buhakorerwa harimo gahunda yo korora amatungo mato kandi tugenere itungo buri rugo;
- ✓ Ku kibazo cya politiki yo guhurizahamwe ubutaka, bizaharirwa ubutaka bwa Leta n'abikorera ku giti cyabo, ariko ubutaka bw'abaturage ntibuhurizwe hamwe;
- ✓ Tuzashyiraho Politike iha abaturage uburenganzira bwo guhinga ibyo bifuzwa, begerezwe abakangurambaga mu buhinzi (moniteur-agri) babafashe guhinga kijyambere, naho ibyo guhinga igihingwa kimwe bikorwe n'abahinzi bagamije ubucuruzi mu buhinzi kuko aribo bafite ubutaka bunini (commercial farming) cyangwa bakoresha ubutaka bwa Leta;
- ✓ Mu kunoza gahunda y'ubuhinzi, tuzashyiraho itegeko rigena muri buri Kagali umukozi ushinze ubuhinzi, aho abakozi bazajya basanga abaturage mu mirima yabo bakabaha inama mbonezamihingire (*Extension Workers*);
- ✓ Tuzashyiraho itegeko rigena ikigega cy'ingwate kubahinzi n'aborozi (**Rwanda Agriculture Support Fund**), izi ngamba zose twavuze haruruguru zizarwanya, inzara umuhinzi agire agaciro, umwuga we umubere, igiciro ku isoko ry'ibiribwa kigabanuke;
- ✓ Tuzashyiraho itegeko rigena ikigega gifasha urubyiruko ruri hagati y'imyaka 15-24 rukora umurimo w'ubuhinzi n'ubworozi;
- ✓ Tuzashyiraho itegeko rigena ikigo kirwanya inzara (Feed Rwanda Institute/Center). Kizaba gishinzwe kongera umusaruro w'abahinzi n'aborozi, kugenzura no kugena ibiciro ku bihingwa, giteza imbere imirimo y'urubyiruko ikomoka k'ubuhinzi (Agri-business jobs for youth), kikazaba kandi gifite uruhare mu kongera uburumbuke bw'ubutaka.

URWEGO RW'IBIDUKIKIJE

- ✓ Tuzashyiraho gahunda yo gukora amakarita mashya yerekana ahari amabuye y'agaciro n'ubwoko bw'amabuye buhaboneka;
- ✓ Tuzasuzuma, tuvugurure itegeko rigena umurongo usobanutse w'itangwa ry'ibyangombwa, ugiye kubihabwa habanze hakorwe igenzura riciye mu mucyo Kugira

ngo habeho gukurikiranira hafi no gukomeza amategeko agenga icukurwa rya kariyeri n'amabuye y'agaciro kugirango bitagira ingaruka ku misozi, ibishanga, n'imigezi;

- ✓ Tuzashyiraho itegeko rigena uburyo buboneye bwo gukoresha umutungo kamere muri rusange no gukangurira abaturarwanda kubahiriza amategeko agenga umutungo kamere;
- ✓ Gushishikariza banyiri amashyamba mu micungire myiza y'amashyamba no kuyakoresha neza ibiyakomokaho tuzabigira umukoro wacu;
- ✓ Tuzasuzuma, tuvugurure amategeko ajyanye no kurwanya isuri ahantu hose hahanamyeye; hanaterwa ibiti ahantu hose hakwiye;
- ✓ Tuzashyiraho gahunda yo gutera ibiti bivangwa n'imyaka aho bahinga hose;
- ✓ Tuzashyiraho itegeko rigena ikigo cyigenga gishinzwe kugenzura ibyangijwe n'ababa mumirimo ifitanye isano n'ibidukikije hagamijwe guca burundu ibihombo bituruka ku iyangizwa ry'ibidukikije.
- ✓ Tuzashyiraho politike izadufasha kurwanya ihindagurika ry'ikirere. Hongererwe ubushobozi ikigo gishinzwe iteganyagihe (METEO RWANDA).